

ՄԿՐՏԻՉ ԱՐՄԵՆԻ «ՀԵՂՆԱՐ ԱՂԲՅՈՒՐ» ՎԻՊԱԿԸ

«Հեղնար աղբյուր» վիպակը Մ. Արմենը գրել է 1933-1935 թվականներին Երևանում: Ունեցել է մի քանի հրատարակություններ և զետեղվել «Երկեր»-ի ժողովածուի 2-րդ հատորի մեջ (1967): Ժամանակի ընթացքում գրողը խմբագրական միջամտություններ է կատարել: Որպես վերջնական տարբերակ ընդունում ենք «Երկեր»-ի ժողովածուի մեջ զետեղվածը:

Նախորդ հրատարակություններում կա ծոց՝ «Ամենասիրելի վարպետ Ավետիք Իսահակյանին», ինչը «Երկեր»-ում բացակայում է:

«Հեղնար աղբյուրի» ծնունդը 1930-ականների առաջին կեսին պատահական չէր և արդյունք է գրական մի շարժման, որի ակունքում Ե. Չարենցի «Երկիր Նաիրի» վեպն էր: Հեռացող պատմական հայրենիքը դառնում էր գրականություն: Չարենցի օրինակով Գ. Մահարին գրեց իր «Մանկություն» (1929) և «Պատանեկություն» (1930), Վ. Թոթովենցը՝ «Կյանքը հին հռոմեական ժամապարհի վրա» (1930-1933), Ձ. Եսայանը՝ «Սիլիհտարի պարտեզները» (1935) ինքնակենսագրական վիպակները:

Նույն ստեղծագործական ուղղվածությունը ծնունդ տվեց նաև Արմենի «Հեղնար աղբյուր» և Ա. Բակունցի «Կորես» (1936) վիպակներին: Նրանք, բարեբախտաբար, չէին կորցրել իրենց ծննդավայրերը, բայց կարողացան Գյումրին և Գորիսը կերպավորել իրական և առասպելական գծերով:

Առասպելի ծնունդն է ահա Արմենի վիպակը: Նոր գրականության պահանջներին ունկնդիր, որը տառնում էր դեպի գաղափարական սահմանափակումներ, ի վերջո՝ սխեմատիզմ, գրողն այս վիպակը գրելիս զարմանալիորեն կարողացավ ոչ թե կերպարանափոխվել, այլ վերագտնել ինքը իրեն: Նա գնաց ոչ թե մերկապարանոց գաղափարների ետևից, այլ ոգեկոչեց իրական, կենսական կյանքը: Ուժ և խիզախություն էր պահանջվում գրողից այսպիսի երկ ստեղծելու համար խիստ գաղափարականացված ժամանակներում: Մ. Արմենն ասես իրականացրեց Ե. Չարենցի «Գիրք ծանապարհի»-ի պատվիրաններից մեկը, ըստ որի՝ երգը ծնվում է ոչ թե ծայրերից կամ բառերից, այլ՝ երկրից, հարազատ միջավայրից: Ընդ որում՝ Արմենն այն պատկերեց ոչ թե մասնակի ընդգրկումով, այլ՝ ամբողջական և համապարփակ: Այստեղ և՛ միջավայրն է, և՛ նյութն է, և՛ հերոսներն են, և՛ լեզուն է, և՛ խոսքի ներքին բարոյախոսությունը...

Մուտքի նախադասությունը շատ հանդիսավոր է ու տարողունակ. «Լեցինականի հին թաղերից մեկում՝ Ձորի Բողազում, որն ամենայն իրավամբ դեռ

կարող էր կրել Գյումրի անունը, իր փոքրիկ տան մեջ մեռնում էր աղքատիւների հռչակավոր վարպետ ուստա Մկրտիչը»¹:

Ամմիջապես աչքի առջև է կանգնում հին Գյումրին՝ իր Ձորի Բողազ թաղով՝ հուշելով, որ դեպքերը կատարվում են մեր ժամանակներում, քանի որ Ալեքսանդրապոլը Լեռնական վերանվանվեց 1924-ին: Աչքի առջև է կանգնում նաև աղքատների վարպետ ուստա Մկրտչի ազդեցիկ կերպարը: Մեռնում էր մի մարդ, որի կյանքի պատմությունն էլ պիտի դառնար վիպակի բովանդակությունը:

Ավելի խորացնելու և տպավորիչ դարձնելու համար ընթերցողական հետաքրքրությունը՝ հեղինակը թանձրացնում է իր հերոսի կյանքի առեղծվածը: «Թեև նա վաթսուհինգ տարեկան էր, բայց ծերությունը չէր նրա մեռնելու պատճառը, որովհետև նա դեռ ամրակազմ էր և առողջ: ... Նա մեռնում էր, որովհետև հասել էր իր նպատակին, որովհետև վերջացրել էր իր հաշիվները աշխարհի հետ: Նա դրսում այլևս ոչինչ չուներ անելու»²:

Նա աշխատել էր քառասուն տարի, կառուցել էր քառասուն աղբյուր: Քառասուններորդ աղբյուրը կառուցելուց հետո մահկանացուն կնքել էր նրա ներքին որոշումը, այլ կերպ՝ երդումը: Ուստա Մկրտչի մահը գիտակցված մահ էր. «Եվ նա մեռնում էր հանդարտ, տխուր և խորիմաստ մահով»³:

Հեղինակը տեղին օգտագործել է Գյումրվա բարբառը և, տեղական կոլորիտը պահպանելով՝ խոսեցրել իր հերոսներին:

«Վերջին պամկն է, ներող էղեք»⁴, - ասում է ուստան, և ծայր է առնում զրույցը: Խոսում են կամուրջ կառուցող Ավետիքը, տուն կառուցող Կարոն, ջրհորներ փորող Աղասին, վարպետներ Բագրատը, Սարգիսը, Օնեսը, Գյումրիի իսկական մարդիկ:

Նրանց խոսքի նյութը կյանքն է ու մահը: «Աշխուրքի օրենքն է էղպես, Մկրտիչ, - ասում է Կարոն: - Բոլորի ախպուրն էլ մե օրըմ պիտի ցամքի: Հմը մարդ կա, օր իրան ետևեն հիշատակ ունի, մարդ կա, օր չունի: Քու ախպուրդ ցամքավ, հմը քառասուն հատ կա քու տեղակդ»⁵:

Իր կյանքի ցամաքած աղբյուրն ուստա Մկրտիչը նմանեցնում է Հեղնարի ցամաքած աղբյուրին: Բոլորի համար Հեղնարի անունը խորհուրդ ուներ, ինչն էլ նրանց միտքը տանում է տարիների խորքը, քսան տարի ետ:

Աստիճանական զարգացումով վիպակի նախադրությունը վերածվում է հանգույցի:

1 Մ. Արմեն, Երկեր, հ. 2, Ե., «Հայաստան», 1967, էջ 473:

2 Նույն տեղում:

3 Նույն տեղում:

4 Նույն տեղում, էջ 477:

5 Նույն տեղում, էջ 476:

Հեղմար աղբյուրն այնքան արտասովոր էր, որ չէր մտնում ուստա Մկրտչի քառասուն աղբյուրների շարքի մեջ: Հեղմար աղբյուրի հրաշքը կատարվել էր մեկ անգամ և այլևս չէր կրկնվել: Հրաշքին ներկաներն այդ պահին մտածել են, թե դա գերբնական, աստվածային ուժն է: Բայց հիմա առասպելի վերածված հրաշքն ավելի է գրավում նրանց և խնդրում են ուստա Մկրտչին մահից առաջ բացահայտել այդ առեղծվածը: «Ախպուրը ձեռագործ է, հրաշքը՝ անձեռագործ», - ասում է ուստան այնքան բնական, որ ինքն էլ հավատում է իր իմացած հրաշքին. «Ես կրնամ պարզե մենցակ իմ ախպուրս, Ասպած էլ թող պարզե իրան հրաշքը՝ թե օր կամենա»¹:

Ուստա Մկրտչի մահը օրերի հարց է, և այս ընթացքում նա պիտի բացահայտի մի գաղտնիք, և դա լինելու է Հեղմար աղբյուրի գաղտնիքը:

Նախ բացվում են ուստա Մկրտչի կյանքի էջերը: Քսանվեց տարեկանում, կառուցելով իր առաջին աղբյուրը, Մկրտիչը Գյումրու հռչակավոր վարպետների կողմից ստանում է ուստա կոչումը: Նա իր համար հարսնացու պիտի ընտրեր՝ ջրի եկող աղբիկներից առաջինին: Հեղմարը եկավ երրորդը: Բայց Մկրտիչը մորն ասում է, թե Հեղմարը ջրի եկած առաջին աղբիկն էր և հենց այդ պահից էլ սարսափում է Աստծու պատժից: Ահա այս պահի մեջ է ուստա Մկրտիչը տեսնում իր մեղքը, և երբ Հաջին ասում է, որ իր մեղքը աշխարհի չափ է, ուստան դրա մեջ նաև մեղքի իր բաժինն է տեսնում:

Հարսի՝ Մանանի հետ խոսելիս ուստան ասում է, որ նեղացած է որդուց, որը իր արհեստը իրենից սովորելու փոխարեն գնացել է ուրիշներից սովորելու: Եթե ուրիշները պրոֆեսոր են, ինքը ամենամեծ պրոֆեսորն է. «Թող սորվի ումեն օր կուզե, հմը առանց իրան հոր գիտութանը՝ էնոր ուսմունքն արժեք չունի»²: Եվ պատվիրում է՝ թող որդին քանդի իր քառասուն աղբյուրներից որ մեկը կամենա և սովորի աղբյուր կառուցելու գաղտնիքը, բայց նզովքի արժանանալու վտանգով անգամ ձեռք չտա միայն Հեղմար աղբյուրին, որի տակ գերեզման կա: Նրա համար Հեղմար աղբյուրը ուրիշ է... Ուստա Մկրտչի ցավն այն է, որ ներկա սերունդը աստվածավախ չէ. «Հիմի մարդն ստուգել կուզե ասպածային հրաշքը»: Հարսի առարկությանը, թե՝ «հրաշք չկա», ավելացնում է. «Հրաշքը կա ավտոդդի համար,... հմը ավտոդդը հրաշքը չի տեսնի: Կըսես տղիս, օր Հեղմար ախպուրի հրաշքը ոնչ թե չոր քարի կամ թաց հողի մեջ է, այլ իմ ժամանակվաս մարդոց հավատացյալ հոգու»³:

Այդ պահին ներս է մտնում որդին՝ Գալուստը, բայց հայրը արդեն մեռած էր: Ավարտվում է հրաշքների ժամանակը, սկսվում է նոր սերնդի դաժան ռեալիզմը: Հարսի հետ զրուցելիս կա մի շատ նուրբ պահ. Ուստա Մկրտիչը հարց-

1 Նույն տեղում, էջ 479:

2 Նույն տեղում, էջ 489:

3 Նույն տեղում, էջ 489:

նում է՝ ժամը քանիսն է, մահամերձը ժամ է հարցնում, և մինչ հարսը կգտներ ժամացույցը և կպատասխաներ, ինքը ավելացնում է՝ «իրեք ռուպե է պա-կաս...»¹: Ինքը գիտեր, հարսն էլ հասկանում է խոսքի իմաստը:

Այս առասպելախառն պատմությամբ, ժողովրդական խոսքի իմաստուն ասությաներով, կյանքի իմաստով ու կյանքի մայրամուտով էլ ավարտվում է վի-պակի առաջին մասը: Անցյալ է դառնում ուստա Մկրտչի հրաշքը:

Հոր մահից հետո Ձորի Բողազի բացվող առավոտին է նայում որդին՝ նա՛, ով պիտի գար, ով եկավ և որի անունն էր Գալուստ: Ե՛վ հերոսը, և՛ նրա Գալուստ անունը նոր ժամանակների մարդու գալուստն են հիշեցնում: Մ. Արմենը շատ հստակորեն դեմ-դիմաց է դնում հին ու նոր ուժերին, որովհետև որդու գաղա-փարական հիմքը ոչ թե ավանդույթի փոխարկված սերունդների հիշողությունն է, այլ՝ օրվա գաղափարախոսությունը: Իսկ սա նշանակում է, որ հայրն ու նրա ընկերները մարմնավորում էին Գյումրին, իսկ Գալուստը՝ Լենինականը:

Մինչև այստեղ վիպակի նախաբանն էր: Այսքանն ինքնին փակ ու ավար-տուն մի ամբողջություն է, որ կարող է նաև շարունակվել: Իսկ եթե անգամ չշարունակվեր, այսքանը կմնար որպես շատ լավ, շատ հարուստ կոլորի-տով գրված մի պատմվածք: Ընդ որում՝ կոլորիտը մի կողմից խոսքային է՝ Գյումրվա կենդանի բարբառով, մյուս կողմից՝ բնանկարային՝ Ձորի Բողազով, Արփաչայով, քաղաքային տեսարաններով:

Նախաբանին հաջորդում է ևս չորս գլուխ և վերջաբանը: Վիպակի կառուց-վածքը համապատասխան է պատումի գեղարվեստական զարգացմանը:

Առաջին գլուխն սկսվում է քաղաքի բնակիչների նախահայրերի պատ-մությամբ, որոնք եկել էին Կարինից, Իզմիրից, Պոլսից և, ըստ իրենց ծննդա-վայրի, կառուցել իրենց թաղերը: Գյումրիի տները՝ սև տուֆից, կարմիր տուֆի զարդանախշերով դարսերով ու քիվերով: Քառակուսի կամ կամարաձև դռներ ու պատուհաններ՝ փայտը դրվագած, մետաղների մեջ ագուցած, որոնց փեղկերը դրսից ծածկվում էին խլափեղկերով: Փեղկերի մեջ փոքրիկ դռնակ-ներ՝ երկաթե թակով, որոնք բացվում են դեպի բակ: Այս նկարագրությունը բացում է ոչ միայն հայկական, այլև հունական ու թուրքական թաղամասերի ներսի կյանքը: Քաղաքը տարածվում է դեպի զորամասերն ու բոստանները, իսկ կենտրոնը շուկան էր:

Այդ քաղաքում տարբեր ազգություններ խառնված էին իրար, որովհետև բոլորը մի ժողովուրդ էին՝ «գյումրեցի արհեստավորների ժողովուրդը»²: Բայց

1 Նույն տեղում, էջ 490:

2 Նույն տեղում, էջ 505:

տարբեր էին նրանց հավատն ու սովորությունները, ինչը երևում էր ոչ միայն կրոնական սահմանափակումների մեջ, այլև բաղնիք գնալիս:

Ահա բոստանների միջով անցնող ճանապարհով, չադրայով փաթաթված, թուրքական թաղ է գնում մի կին: Թեև քողարկված էր նա, բայց երևում էր, որ գեղեցիկ է, բայց նաև անհամգիստ: Ներքին տապից բռնկված՝ նա ցանկանում է աղբյուրից ջուր խմել, բայց երբ շրթունքները մոտեցնում է խողովակին՝ ջուրը կտրվում է: Տաճ տները, կնոջը չտեսնելով, ջուրը շուռ էր տվել բոստանը շրելու: Տաճտեր հայը գնալովում է կնոջ գեղեցկությանը, նույն օրը հրավիրում է ուստա Մկրտչին, պատվիրում ուրիշ ջուր բերել բոստանի համար, որպեսզի խմելու ջուրը երբեք չկտրվի:

Չադրայով կինը թուրքերի թաղի աղբյուրից է ուզում ջուր խմել: Երբ ջուր-թերը մոտեցնում է ջրին, ժչում է և հարցնողներին բացատրում. «Եթ աչքս ընկավ ախպուրի վրա ուստի անվանը, ընձի էնպես թվաց, թե էնտից ընձի տղամարդ աշեց...»¹: Այս կինը թուրքերի թաղում տուն էր վարձել՝ Հաքիբայի տունը, որն, ահա, տասը տարի է, ինչ մեկնել էր Մեքքա ու չէր վերադարձել: Այս նոր կինն էլ, մոտ 34-35 տարեկան, ներկայանում է Հաքիբա անունով: Նա անմատչելի էր հարևանների համար և ապրում էր որպես առեղծված՝ դոսի համար փակ, ներսից՝ իր կյանքով՝ շեն ու լի այդ տան մեջ: Այդ տանը կինը հանդիպում էր մի երիտասարդի: Դա սիրո տուն էր:

Գաղտնիքը բացվում է: Կինը ուստա Մկրտչի կողակից Հեղմարն է, երիտասարդը՝ Վարոսը: Սերը նրանց միավորել էր գաղտնիքի մեջ, և այս տունը նրանց սիրո տունն էր: Բայց սկզբից ևեթ կինը գիտեր, որ իրենց բռնած գործը արդար չէ, Աստծու սրտով չէ...:

Քաղաքն առասպելների մեջ է: Պատմությունները շատ են, որոնք առասպելի նման օղակում են սիրո տան առեղծվածը:

Խոշոր ընդգրկումով բացվում է Երանոսի կերպարը: Նրա ուշքն ու միտքը այն հրեղեն կինն էր, որը եկավ ու անցավ: Կիրակի օրերը սիրո օրեր էին այդ կնոջ համար, և Երանոսն սպասում էր տեսնելու նրան: Ահա գալիս է կինը: Երանոսը կտրում է նրա ճանապարհը, բայց կինը փակ գաղտնիքի նման անցնում է առաջ:

Ուստա Մկրտիչը ճանաչում էր Չորի Բողազի երկհարկանի քարե տանը ապրող ոսկերիչ Վաղինակի որդի Վարոսին, որն, ահա, գաղտնի սիրով կապված էր իր կնոջ հետ: Ուստան դեռ ոչինչ չգիտեր և խրատ է տալիս երիտասարդին, թե՛ հորդ վաստակած միջոցները քամուն մի տուր, արհեստ սովորիր: Մինչդեռ նա քամուն էր տալիս իր պատիվը:

Գրավիչ մի առեղծված, որ դեռևս գաղտնի ու չբացահայտված կապերն են, առաջ է տանում շարադրանքը:

1 Նույն տեղում, էջ 510:

Ուստա Մկրտիչն այցելում է Երանոսին, հյուրասիրությունը ևս ծես է: Երանոսն ամուսնացած է և ունի վեց տարեկան աղջիկ, իսկ ուստա Մկրտիչը ուր տարեկան տղա, առաջնեկը եթե ապրեր, կլիներ տասնութ տարեկան:

Երանոսը խմում է և պատմում հոգու ցավը: Ուստայի համար ձևախեղվում է նահապետական մարդու արդար նկարագիրը: Երանոսի զարմանքին պատասխանում է. «Հեռո՛ւ քաշվի, անամուս: Թյո՛ւ... Ըպը տարի՞քդ, գերդաստա՛նդ, մամո՛ւտդ... Ես ի՞նչ էր լսեցի...»¹: Երանոսի սերը դառնում է պատիժ: Ուստա Մկրտչից նա խելք է ուզում սովորել: Եվ խոստովանում է, որ կնոջ հետ ամուսնացել է ծնողների խոսքին չհակառակվելու համար, որին երբեք չի սիրել: Ուստան չգիտեր, որ Երանոսը սիրահարվել է թուրքի շորերով ծպտված իր կնոջը: Ուստայի վերջնական խորհուրդն է. «Սիրտդ իստըկե էդ աղտից»²:

Մկրտիչը երջանիկ էր իր ընտանիքով, իր Հեղնարով: Եվ Երանոսին ծանր վիճակից հանելու համար հրավիրում է իր տուն՝ պատիվ տալու: Պատիվ՝ պատվի դիմաց:

Ուստա Մկրտիչը գնում է: Քիչ ավելի ուշ, այգում գործերն ավարտելուց հետո, նրա տան ծանապարհն է բռնում նաև Երանոսը: Երեկոյան մութի մեջ նա հանկարծ նկատում է չադրայով կնոջը, որը թաքնվում է նրա տեսադաշտից: Ծանապարհին ուստա Մկրտչի տան տեղն իմանալու համար հարցում է անում Վարոսին: Երանոսը հասնում է ուստա Մկրտչի տուն, և նրա առաջ սեղան է բացում... չադրայով կինը: Երանոսը ցնցվում է՝ անակնկալից կաթվածահար: Երանոսը հիշում է առասպելախառն պատմություններ, թե երբեմն սատանան գեղեցիկ թրքուհու կերպարանքով այցելում և խելքից հանում է մարդկանց: Հիմա նրա աչքի առջև այդ հրաշքն էր: Հավատա՛լ աչքի տեսածին, թե՛ ոչ: Կինը դրսի շորերով էր, նոր էր եկել սիրո տնից: Նա ամբողջովին արդուզարդի և գլխազարդի ոսկիների մեջ էր՝ իսկը գեղեցկության մարմնացում: Երանոսը մի պահ տատանվում է՝ սա ա՛յն կինն է, թե՛ նման է նրան: Ուստա Մկրտչի կինը ինչու՞ պիտի չադրայով երևար Թուրքի թաղում: Ի վերջո, նա հասկանում է, որ այդ կինը ոչ թե տեսիլք է, այլ՝ իրականություն. «Չարմանալի մի լույս սփռվել էր սենյակում, իսկ այդ լույսի մեջ կանգնել էր սքանչելի կինը»³: Կենացները, հյուրասիրությունը արդեն այս սքանչելիքի շարունակությունն են: Երանոսը խմում է Հեղնարի կենացը և ասում. «Ընտանիքի պատիվը սուրբ է... Հմը սերն էլ է սուրբ... Ո՛րն է ավելի սուրբ՝ Ասպած գիտե... Վով ընտանիքի պատվի համար իրան սերը սըպանե՛ իրան կսըպանե... Վով սիրու համար ընտանիքի պատիվը սըպանե՛ ընտանիքը կսըպանե... Տա Ասպած, օր ամեն տեղ ընտանիքն ու սերն

1 Նույն տեղում, էջ 535:

2 Նույն տեղում, էջ 537:

3 Նույն տեղում, էջ 548:

իրար բռնեն, իրար հետ էղման...»¹: Ուստա Մկրտիչը համաձայնվում է երանոսի մտքերին: «Ընտանիքի պատիվն արհեստավորի պես է,-շարունակեց երանոսը,- արհեստավորի ճակատի պես բաց է, սրտի պես ազնիվ, ձեռքի պես հալալ...»: Նա դեռևս շարունակում է. «<Մը սերը թուրքի կնկա պես է...: Թուրքի կնկա պես սերն էլ չադրի տակ է, օր ոնչ տեսնել կարելի է, ոնչ իմանալ...»²: Հեղմարն այս խոսքերից գունատվում է և լարվում: Իսկ երանոսը ուստա Մկրտիչի հավանությամբ շարունակում է. «Տղամարդն ընտանիքի սունն է, իսկ կնիկը՝ երգիկը: Սունն իրա գլխու վրա պիտի պահե երգիկը, հմը երգիկն էլ պիտի արգիլե, օր ոնչ թե մեծնակ անձրևը չլցվե տունը, այլ նաև օտար աչքը ներս չաչե...»: Այս խոսքերի վրա նա ասում է. «Կենացդ, բաջի...»³:

Հեղմարը ծչում է հանցանքի մեջ բռնվածի պես, իսկ ուստան հանգստացնում է երանոսին. «Անհանգիստ մի եղնի, երանոս, կանցնի: Էս մէ ամիսն է, օր Հեղմարս իսպես է՝ մեկ-մեկ կծչա ու գույնը կքցե... Վախեցած կերևնա...»⁴:

Երանոսը գիշերով դուրս է գալիս ուստա Մկրտիչի տնից, իսկ առավոտյան նրան գտնում են իր այգում, թախտի վրա, դառնակ սրտի մեջ: Զննությամբ հաստատվում է որպես ինքնասպանություն, բայց մահվան վերջնական պատասխանը հետո պիտի տրվեր:

Սա վիպակի ամենալարված տեսարաններից մեկն է. իրար են բախվում երանոսի հոգում բռնկված սերը, ուստա Մկրտիչի արդար ու բարձր կերպարը և Հեղմարի գաղտնիքը: «Կենացդ, բաջի...», - խոսքը փարատումն է այն ներքին կասկածի, որ երանոսն ուներ Հեղմարի հանդեպ, նրա համար արդեն պարզ էր, որ Հեղմարը չադրաների մեջ քողարկված կինն էր: Գյուրվա մի ամբողջ կենցաղ, հարաբերությունների ու ընտանեկան դրվածքի մի ամբողջ նկարագիր կա այս հատվածի մեջ, որը, ըստ էության, վիպակի գագաթնակետն է:

Հաբիբա-Հեղմարի գեղեցկության առասպելն արդեն հայտնի էր թաղի բնակիչներին, ինչը նաև նրա հանդեպ թաքնված խանդի զգացողություններ է արթնացնում: Մուլլայի հորդորով որոշում են կնոջը վնդել, սիրեկանին՝ ծեծել:

Հեղմարին նկատում են նաև աղբյուր ջրի եկած թուրք կանայք, որոնց արդեն հայտնի էր Հաբիբայի գաղտնիքը: Մուլլայի կինը տան մուտքի մոտ կտրում է նրա ծանապարհը, ամոթանք տալիս: Հեղմարը թաքնվում է տանը: Նրա հետքով գալիս է ուստա Մկրտիչը, երևում է Վարոսը: Ուստա Մկրտիչը մտնում է տուն և տեսնում սենյակի մեջ ծնկաչոք աղոթող Հեղմարին: Տեսնելով ամուսնուն՝ նա նվաղում է և սրտի կաթվածից հանկարծամահ է լինում:

1 Նույն տեղում, էջ 551:

2 Նույն տեղում, էջ 552:

3 Նույն տեղում:

4 Նույն տեղում:

Լուրը տարածվում է քաղաքով մեկ: Հեղճարին ուստա Մկրտիչն այդ տան այգում էլ թաղում է: Քառասուն օր նա մնում է այդ տան մեջ և կառուցում համագուցյալ կնոջ դամբարանը, որն այլ կերպ պետք է կոչվեր Հեղճար աղբյուր:

Շատ դիպուկ է Վարոսի մասին պատմող չորրորդ գլխի մուտքը. «Ոսկերիչ Վաղինակի տղան՝ Վարոսը, քանդեց օձիքի կոճակները և շարունակեց քայլել»¹: Օձիքի կոճակները քանդելն ու շարունակ քայլելը պիտի դառնային նրա ծակատագիրը: Այդպես է, որովհետև նա բաց էր թողել իր կյանքի երասանները:

Վարոսը չի քողարկում եղածը, թեև կարող է քողարկել, քանի որ իր ինքնությունը բացահայտված չէր: Բայց սերը, Հեղճարի հիշատակը և իր ներքին նվիրումն ու ազնվությունը նրան տանում են իր ծակատագրի ետևից:

Հեղճարի մահվան օրը նրանց չկայացած հանդիպման օրն էր: Նա խույս տվեց հայացքներից և հեռացավ: Բայց հիմա հոգին կեղեքվում է՝ ո՛ւմ պատմել ցավը և կամ ինչո՞ւ պատմել:

Վարոսն ունի մեկ ինքնարդարացում. «Ո՛վ ասաց, թե սերը մեղք է, ո՛վ է դրել այդ օրենքը...»²:

Վարոսն այլևս ոչինչ չուներ Գյումրիում: Ամեն ինչ Հեղճարին էր հիշեցնում, բայց Հեղճարը չկար: Եվ նա որոշում է հեռանալ Գյումրիից և գնալ... Երուսաղեմ:

Հեղճարն ինչո՞ւ տրվեց Վարոսին, ինչո՞ւ պղծեց ամուսնական մահի՞ծը: Սերն է,- կասի գրողը, որի զգացմունքային հեղեղը արդեն հորդել է սիրո տանը նրանց հանդիպումների ժամանակ: Սերն է, որ նրան համարձակություն է տալիս խախտելու այդ ավանդապահ քաղաքի բարքերը և թեկուզ վախճ սրտում, թեկուզ քողարկված, բայց ներքին վստահությամբ գնալ սիրո տուն:

Մինչ Վարոսն իր սիրո հիշողությունների մեջ էր՝ ուստա Մկրտիչը կառուցում է Հեղճար աղբյուրը: Քաղաքում տարածվում է Հեղճար աղբյուրի հրաշքի լուրը: Աղբյուրի գլխաքարին ուստա Մկրտիչը փորագրում է. «Ամեն մե կնիկ իրան մարդու ախպուրն է, ուրիշ հեջ մեկը իրավունք չունի խմելու էնոր ջրեն»³: Բոլորի առջև աղբյուրի ջուրը կտրվում է, ով մոտենում է ծորակին՝ շվարում է հրաշքի վրա: Բոլորը Աստծուց ներողություն են խնդրում և մեղա կանչում:

Խելագարի ծայրով աղբյուրին է մոտենում Վարոսը: Մ. Արմենը ծշգրիտ է արձանագրել պահի հոգեբանական ընկալումը:

Հրաշալի է պատկերված Վարոսի հրապարակային ինքնաբացահայտումն ու զղջումը, իրեն մեղավոր է համարում Հեղճարի կորստյան համար. «Թողություն է լղնի քեզի, Հեղճա՛ր, օր իմ դժոխային սերս ընդունեցիր: Թողութե՛

1 Նույն տեղում, էջ 580:

2 Նույն տեղում, էջ 585:

3 Նույն տեղում, էջ 599:

յուն էղնի քեզի, ազիզ, օր մե գիշերն եկար ու մարդասպանութեան գործն ընծի տորվեցուցիր»¹:

Վարդուռ Ճանապարհ է բռնում դեպի Երուսաղեմ, իսկ Ուստա Մկրտիչը բուրդի աչքի առջև իջնում ու խմում է <եղնար աղբյուրի ջուրը: Նրա հեռանալուց հետո այն ընդմիշտ պիտի ցամաքեր: Մնում է հրաշքի տպավորությունը և ուստա Մկրտչի հասցեին գյումրեցիների հոգում պահած օրհնանքը. «Պայծառ մնաս, ուստա Մկրտիչ...»:

Վարդուռ իր խոսքի մեջ բացահայտեց նաև մի գաղտնիք. այդ նա էր <եղնարի ցուցումով սպանել Երանոսին: Վերջինիս «Կենացդ, բաջի» խոսքը անհետևանք չէր մնացել:

Վիպակն ավարտվում է վերջաբանով: Գալուստը, հոր թաղումից հետո, այցելում է մոր գերեզմանին: Հակառակ հոր պատվիրանի և անգամ նգովքի, քանդում է հրաշագործված կառույցը և բացահայտում <եղնար աղբյուրի հրաշքը: Հայրերն ու որդիները բաժանվում են իրարից, բաժանողը հայրերին ու որդիներին հակադրող մոր ժամանակներն են՝ իրենց հավատուրաց բարքերով: Եվ այս տեսակետից Գալուստի կերպարը դրական զգացմունքներ չի արթնացնում: Գալուստի այդ բացահայտումը նաև <եղնար աղբյուրի հրաշքի մահն էր՝ Ուստա Մկրտչի կենսափիլիսոփայության ավարտը: Նա բաց է անում քսան տարի լռած աղբյուրի ակը, և ջուրը շատրվանում է: Հաջին չէր հեռացել: Չարմանքից մի քանի անգամ «Յա՛» է ասում և խոսքերի մեջ սեղմում ավերված կյանքի դառնությունը. «Ըսել է՝ սո՛ւտ էր ամեն ինչ... Յա՛... Ըպը կյանքս ընչի՞՝ անցավ...»²: Այս վերջին արտահայտությունը դառնում է ավարտվող վիպակի լեյտմոտիվը:

Ավելանում է ևս մի տեսարան: Երկու կառքով Արփաչայի ծորն են իջնում վարպետ Ավետիքը և նվագածուները: Կառքերից մեկը դատարկ էր: Յոթ վարպետներից մնացել էր միայն Ավետիքը: Նա իր բացակա ընկերների կենացն է խմում, և ինքն էլ ավարտում իր կյանքի ուղին, կառապաններին ասելով «Բշե՛ք, էրթամ-անցնեմ վերջին կարմուրջի վրայնե...»³: Նա կառուցել էր իր տասներկուերորդ կամուրջը և երդումի համաձայն արդեն պիտի մեռներ:

Այս վերջին տեսարանը լրացնում է գաղտնիքը բացահայտած <եղնար աղբյուրի պատկերներին, որովհետև դրանցով հեղինակն ուզում է ասել, որ Լենինական դարձած Գյումրի քաղաքի պատմության մեջ ավարտվում է կյանքի մի դարաշրջան՝ նահապետական վարք ու բարքի տեր վարպետների, ժողովրդական իմաստության, կյանքի ավանդական բարոյականության մի ժամանակ, երբ դեռ կար Աստծու վախը և հրաշքի գիտակցությունը:

1 Նույն տեղում:

2 Նույն տեղում, էջ 613:

3 Նույն տեղում, էջ 615: